

Efesus

¹ Aya Pol, Negur nẽ oroya bunem, Kristus Jesus nẽ aposel wõ aun,

Efesus Negur nẽ tamo kayau, Kristus Jesus el de dõ difedig anidi bun, pas enei atotof.

² Negur neda Tamada ado Odug Jesus Kristus neid wau ifenẽya ado wau inosiya, ã bun ibodõf.

Kristus Bunem Uur Nẽ El Fiya Ifanadan

³ Ada, neda Odug Jesus Kristus nẽ Tama Negur, ã yana talesauf, ã uur nẽ el fiya Kristus bun saa ilun dibodok anĩ ganan bunem el fadan. ⁴ Negur ã saa teneub ado kare fiya sã mog, ada yogon mala bun, fateul ado amuyẽ sã tabodõf nigin, Jesus bun igirnadan. ⁵ Wau laa fiya bun, Negur ã yogon wau kulĩya ado oroya kilei, Jesus Kristus bunem, ada yaleda fen, Negur nẽ gere tar wowã tauf nigin, mogo igirnadan. ⁶ Anĩ nigin, Negur nẽ wau ifenẽya, are Jesus Negurem ã nigin wau laa fedig anĩ bun, ege luwa ifanadan anĩ nẽ fula fiya medeĩya nigin, Negur yana talesauf. ⁷ Jesus bun, ada, yogon naud bunem kel yaleya, mosor nigin weder tu keleya anĩ, Negur nẽ wau ifenẽya barikã bunem, talen. ⁸ Negur ã yogon wau ifenẽya bunem, kisi biya ado kisi fokõya ganan, ada bun foula fen. ⁹ Agef fen, ã yogon oroya nẽ waa anĩ ifelnadan, are yogon wau kulĩya nẽ kisi Kristus bun kisi fen kilei, ¹⁰ yogon sain anĩ kisi fel wõ youf bun kabĩ yalouf, sain anĩ bun, Negur ã saa teneub ado bun ererb ererb ganan dibodok anĩ, mudur tekelei, Kristus farumen gurif iroulauf.

¹¹ Negur ã yogon oroya dõf fen, ererb ererb ganan age fedig, ã yogon kisi dõf fen, ada mogo igirnadan, age fe di, adag Kristus bun yogon akor talen, ¹² are ada uyulil

Kristus bun wauda iseya talen anĩ, Negur nẽ fula fiya medeĩya yana talesauf nigin age fen. ¹³ Ā momoi anĩ nẽ od, āgenei kel yaleya nẽ biya od anĩ karĩ ge fen, āg Kristus bun ubodōgen. Ā Kristus nigin momoi ge di, Negur ā bun uris, are Awa Uur Fateul Negur afeneĩf yen anĩ inon. ¹⁴ Negur ĩ, idi Negur nẽ anidi kel yaleya fau wōya sã mog, ada neda akor momoi bagai talouf nigin megeir fe fen, Awa Uur Fateul iben, are ada yogon fula fiya medeĩya yana talesauf nigin age fen.

De Fiyēya Ado Kosēya

¹⁵ Age fiya nigin, aya Odug Jesus nigin āgenei momoiya ado, Negur nẽ tamo kayau ganan nigin āgenei wauĩ laa fiya anĩ karĩ au fen, ¹⁶ aya ā nigin Negur de fiyēya to folō afelen. Aya neu kosēya bun ā nigin karĩ aul fen, ¹⁷ neda Odug Jesus Kristus nẽ Negur, Tamada fula fiya medeĩya barikā, ĩ, ā ĩ nigin keleĩ bagai youf nigin, kisi biya ado kurō fesiya nẽ Awa Uur ifeneĩf nigin, kosē audig. ¹⁸ Aya āgenei wauĩ nẽ meleĩ fokō foug nigneg kosē audig, are ā, wau iseya ĩ anĩ bun iweignein, yogon fula fiya medeĩya barikā nẽ akor Negur nẽ tamo kayau bun ibodok anĩ ado, ¹⁹ yogon megeir barikā momoi tauf ada bun kabĩ yalef anĩ, keleĩ youf nigin, age afedig. Megeir are, yogon total barikā anim kabĩ yalef gen, ²⁰ megeir de tekelei anim Kristus bun kabĩ yale fen, ĩ laa bun tamal kel turĩ fiye ken, saa ilun Negur ima biyalē inenen. ²¹ Negur ĩ, Kristus, uyu irouya ganan, yeneid adodo ganan, megeir ganan, odudug ganan ado, yeneid sain enei bun ado sain fau isiyouf buneg ifenēdiyof ani ganan wal fiya bun inenen. ²² Agef fen, Negur ĩ, erib erib ganan Kristus ye farumen gō fel fen, ĩ sios nigin erib erib ganan neid mudur ibodōf nigin igrnen. ²³ Sios are, yogon bouwa, ĩ naab ganan bunem erib erib ganan kisi feledig anĩ nẽ kisi feleya.

2

Kristus Bun Mata Tabodok

¹ Ā kulu āgenei kũ fenēya ado mosor bun gare gen. ² Sain anī bun, ā teneub enei nē naab ado, owōbē tano nē mudur, are uur idi dō fiya sã anidi bun gama kabī yalef anī nē naab dō gen. ³ Idi atun ada gananege, uruwa bun bouwada nē oroya anī dō tafe fen, yogon oroya ado kisi dō tafen. Ada, tamo tunī gananege idi gogū difedin gen, adage age de gogū difadan bunem, Negur nē didi farumen tabodon. ⁴ Anī ere, ada nigin yogon wau laa fiya odug bunem, Negur wau yūya barikā, ⁵ ĩ, ada kũ fenēya bun gare taun sain buneg, ada Kristus geid turī fadan. Are wau ifenēya bunem, ā kel yaleyeyin. ⁶ Agef fen, Negur ĩ, ada Kristus geid kel turī fada fen, Kristus Jesus bun ada ĩ geid saa ilun tabodōf nigin inenadan, ⁷ are, fau isiyouf sain bun, ĩ yogon biya fiya Kristus Jesus bun ifanadan anī bunem, yogon wau ifenēya barikā ifelnēdiyof nigin age fen. ⁸ Wau ifenēya bunem, ā momoiya bunem kel yaleyeyin, are aug bunem sã, Negur nē ege luwa ifenein, ⁹ are kabī bunem sã, anī nigin, taka nem to yana yalesauf. ¹⁰ Ada Negur nē imaba, kabī biya talouf nigin Kristus Jesus bun ada kare fadan, kabī biya are Negur ada age tafouf nigin uruwa bun mogo dodok fanadan.

Kristus Bun Ada Tekelei

¹¹ Anī nigin, uruwa bun, ā gō diyein bunem haiden ubodōge di, idi mulū dilen anidim (are tamo bouwa bun tamo imedim age difen) ā mulū ileyā sã diyein anī karī weleg. ¹² Sain anī bun, ā Kristus nigin gerō ufaregen, ā Israel buneg yenei sã, promis nē bar itenēya buneg ā yaū, tenebur ein wau iseya sã, Negur nigin kelei sã ubodōgen anī karī weleg. ¹³ Anī ere, gama ā uruwa gerō ufaregen anī,

Kristus Jesus bun, Kristus nē naud bunem, Negur non guri yeī ırousiyein.

¹⁴ Ere nigin, Kristus yogo ĩ neda maror, uru anī yale, tekelei inon, agef fen, kiwai fara fiya nē garaī anī narī fen.

¹⁵ ĩ yogo bouwa bunem lo, ĩtāfiya ado, nun anī yaleledin. ĩ yogo bun tamo uru anī bunem, tamo mata tekelei ino fen, maror inouf nigin age fen. ¹⁶ ĩ bouwa tekelei enei bun, idi uruwom aa tetek bunem Negur bun komo fediyouf nigin agef fen, ĩ aa tetek bunem dogo neid kiwai yukesin. ¹⁷ ĩ isi fen, ā haiden gerō ufaregen bun maror nigin wogō yei ken, idi Juda temeleid non difaren anidi buneg, maror nigin wogō fiyēdin. ¹⁸ ĩ bunem, ada uruwom Awa Uur tekelei bunem, Tamada wagen ileyā kisi feleya.

¹⁹ Anī nigin, ā yaū tamo ado tamo urug sã, anī ere, Negur nē tamo kayau geid tekelei fen, Negur nē ibor tar. ²⁰ Ā, aposel ado profet fō gariya dinon anī teten fō gen inoyein, are Kristus Jesus yogo ĩ monog tor gen. ²¹ Kristus bun, fō ganan katō fel fen, Odug bun tempel fateul wō youf nigin fã yef. ²² Kristus bun, āg, mata ibodōya nē modoū Negur yogon Awa Uur bunem ibodōf nē anī wō gouf nigin, weim inoyeik.

3

Pol Haiden Bun Biya Od Wogōya Tamo

¹ Age fiya nigin, aya Pol, haiden ā nigin, Kristus Jesus nē kabī nigin au fen, kalabus bun abodok.

² Momoi bagai, Negur nē wau ifenēya ā nigin aya ifanan anī, naig fe kabī yalen are, ā karī gen. ³ Are waa Negurem kurō fesiya bunem aya ifelnan, are aya mogo tobega bagai atoton gen. ⁴ Ā enei uweseg fen, Kristus nē waa nigin aya wederou fokō felen anī, keleĩ youf. ⁵ Are Awa Uurem Negur nē fateul aposel ado profet bun gama kurō fesin

gen, sain mogo ilelen anĩ nẽ tamo kayau bun tamo idi to agef ifelnẽdin. ⁶ Waa are, biya od bunem, haiden idi Israel geid Negur nẽ akor dalouf, idi ganan bouwa tekelei nẽ bagu fiya dibodõf, agef fen, Kristus Jesus bun promis nẽ akor anĩ weim dalouf.

⁷ Negur nẽ megeir kabĩ yale di, aya Negur nẽ wau ifenẽya ege luwa ifanan anĩ bunem, biya od enei nẽ kabĩ tamo wõ aun. ⁸ Negur nẽ tamo kayau ganan atun, tamo naal farumen aya gai naal bagai anĩ, wau ifenẽya enei aya ifanan, are Kristus nẽ kisi feleya, are imir ken, ileya kisi feleya sã anĩ, haiden bun wogõ auf nigin ado, ⁹ waa enei, kulu isin ganan Negur ereb ereb ganan kare fen anĩ bun iminẽyan ibodon anĩ, naig fe kabĩ yalef anĩ, tamo kayau ganan bun yaor afouf nigin ifanan. ¹⁰ Negur nẽ kisi are, gama sios bunem, Negur nẽ kisi biya fire fire, saa ilun uyu iroudiya ado yeneid adodo ifelnẽdiyof, ¹¹ are Negur ĩ, yogon mata ibodkeleya nẽ oroya, neda Odug Kristus Jesus bun kisif bure felen anĩ kilei, age fen. ¹² Kristus bun, ada Kristus nigin momoiya bunem, karika ado kumĩ sã, Negur wagen ileya kisi feleya. ¹³ Anĩ nigin, aya ã arokeneik, aya ã nigin darau alef ge fen, to felu gouf, darau are ã fula fiya medeĩa ifeneĩa nigin.

Efesus Sios Nigin Kosẽya

¹⁴ Gariya enei nigin, Dei ĩ bunem, yogon ibor ganan saa ilun ado tenebur ein dibodok, ¹⁵ dogo neid yeneid yaledig, aya ĩ wagen iborou bobou afef. ¹⁶ Aya kosẽ auf, ĩ yogon fula fiya medeĩa kisi feleya bunem, yogon Awa Uur bunem megeir ã namein ife fen, megeir yeif nigin, ¹⁷ are Kristus ĩ momoiya bunem ãgenei wauĩ bun ibodõf nigin. Age afe fen, aya kosẽ auf, ã warumutei ado gariya, wau laa fiya bun utenẽg fen, ¹⁸ ã Negur nẽ tamo kayau ganan geid, Kristus nẽ wau laa fiya anĩ, odug naig be fiya, meluk,

ilun ado, namen naig be fiya anĩ ulogouf nigin megeir walogouf, ¹⁹ agog fen, wau laa fiya enei, keleĩ ganan wal fiya anĩ keleĩ youf, anĩ bunem, Negur nē kisi feleya ganan ā bun kisi falauf nigin kosē auf.

²⁰ Ī gama yogon megeir ada namedan kabĩ yalef anĩ bunem, ereb ada to tafef be, kisi tafef anĩ ganan wal fiya, age fiya kisi feleya, ²¹ sios bun ado Kristus Jesus bun, fula fiya medeīya, ibor ganan gai gai ibodok ilauf bun, ĩ bun ibodōf! Momoi.

4

Kristus Bouwa Bun Bagu Fiya

¹ Aya Kristus nigin kalabus bun abod ken, iweigya ā walegen kilei, mata ubodōgouf nigin totol bagai aro-keneik. ² Ā wauĩ adok ukalaisileg fen, molol bagai ubodōgouf. Ā to feseg, wauĩ laa fiya bun abob nē morō uteĩgouf. ³ Awa Uur maror bunem bagu yein anĩ uroug kafĩ walagouf nigin, kabĩ totol waleg. ⁴ Sain ā iweignein, ā wau iseya tekelei bun iweignein, age fiya gen, bouwa tekelei, Awa Uur tekelei, ⁵ Odug tekelei, momoiya tekelei, naan igūya tekelei, ⁶ Negur tekelei, ĩ ganan neid Temeid, ĩ ganan wal fiya, ĩ ganan atun, ĩ ganan namen ibodok.

⁷ Anĩ ere, ada mugu mugu wau ifenēya, Kristus ege luwa ifenēya nigin kisi fen kilei, ifanadan. ⁸ Negur nē Itotoya anĩ nigin eig ye irok,

“Ī ilun iselen sain,

ĩ tamo musei geif irou iselen,

agef fen, ĩ tamo ege luwa ifenēdin.”*

⁹ (“Ī ilun iselen” ya nē gariya are ere? Anĩ nē gariya are, ĩ tenebur farumen bagai buneg isilen. ¹⁰ Ī isilen are, ĩ anĩ saa ilun ganan wal fiya iselen, are owō ganan inolauf nigin

* 4:8: Sam 68:18

age fen.) ¹¹ Inim anĩ, tunĩ aposel kabĩ, tunĩ profet kabĩ, tunĩ soosi kabĩ, tunĩ pastor kabĩ ado tise kabĩ ifenēdin, ¹² are Negur nē tamo kayau, aruna yaleya kabĩ dalouf nigin dodok fedo di, Kristus nē bouwa odugouf nigin age fen. ¹³ Agef ile ile, ada ganan, momoia tekelei ado Negur Naal nigin keleĩ tekelei bun tasi fen, tamo kisi feleya bagai wō tau fen, Kristus nē kisi feleya bagai bun talauf.

¹⁴ Age tafouf, ada baban momou gen to tabodōf, maai moloun wīya gen to age ta fen, tai fiya ganan, tamo neid beugya ado, idegēya tamo neid kisi anidim, yaum fū fe di, aarau ilef isif fedig gen, to wewu fadauf. ¹⁵ Age fiya ban, ada wau laa fiya bun momoi anĩ wogō tau fen, ereb ereb ganan bun Mudur ibodok bun biya daf iselauf, Mudur are Kristus. ¹⁶ Ī bunem, dirumunā ganan bouwa isenne ken, katokitĩ fe, bagu fele di, bouwa nē fara fiya mugu mugu yogon kabĩ yalef bunem, bouwa adok odug fen, wau laa fiya bun yogo inof.

Lalan Nē Gere Tar Gen Tabodōf

¹⁷ Anĩ nigin, aya enei Odug bun totol bagai arokeneik, ā baban, haiden idi difaredig gen, kisi sã gen to ufaragauf. ¹⁸ Idi neid kisi gugum kel fen, Negur nē mata bun ibodōya ditoron, ere nigin, idi wedereid to fokō ye fen, waud totolen. ¹⁹ Idi es fiya kisi ganan ditor ken, idi dogo bouweid adok sane bun difen ken, ereb ereb sane ganan, dogo nigin dogol, es fiya sã age difedig.

²⁰ Anĩ ere, ā Kristus nigin naab anĩ bunem to kelein. ²¹ Momoia bagai, ā ĩ nigin karĩ gen ado, ĩ bun difelnein, are momoi Jesus bun ibodok anĩ kilei. ²² Ā uruwa ubodōgen, āgenei oroya tubu, yogon idegēya oroya bunem sane len anĩ, utorōg fen, ²³ āgenei kisi nē tobonunā bun mata wōg fen, ²⁴ oroya mata, madur bagai ado momoi nē fateul bun Negur gen inon anĩ, ufonūgouf nigin difelnein.

²⁵ Anĩ nigin, ã mugu mugu idegẽya utorõg fen, ã neĩ tã momoi nem urokenẽgouf, ere nigin, ada ganan bouwa tekelei nẽ tunĩ. ²⁶ “Ãgenei seyeya bun, mosor to unog.”†
 ã wauĩ bun to seye yef ile, gaa kuru kalauf. ²⁷ Agog fen, ã Satan nẽ modoũ taka to utoumkenẽgouf. ²⁸ Aib ĩ bẽ ilenouf, baban to bẽ ilauf, anĩ ere, yogo imam ereb biya nigin kabĩ yale di, ĩ lau difef anidi ifenẽdiya nigin safina adouf.

²⁹ Āgenei eweĩ bun od sesen to wõ youf, anĩ ere, idi lau difef anidi fã de dalouf nigin isennẽya od anĩ dogol urõge di, idi karĩ def are isennẽdiyof. ³⁰ Negur nẽ Awa Uur Fateul to wau morõ wenẽg, ĩ bunem kel yaleya nẽ naa nigin uris ã bun inon. ³¹ Ereb ereb dirikeĩ ganan, didi fatuk iseya, seyeya, gurũya, dumen od irõya ado, ereb ereb sane ganan utorõg. ³² Abob el wiyẽg fen, abob nigin wauĩ yu ken, Negur ĩ Kristus bun āgenei mosor nigin weder tu kelen gen, abob nẽ mosor nigin wedereĩ tu kalauf.

5

¹ Anĩ nigin, ã Negur gere tar oboi nigin, ĩ gen bagai ago gouf. ² Kristus ada nigin wau laaf fen, ada nigin yogo bouwa ofa ado sesewi fiya sumeĩ biya gen Negur ifenen gen, wauĩ laa fiya bun agog ubodõgouf.

³ Anĩ ere, ã atun, naal bagai noli tobonunã be, ereb amuyẽ ado taka be, safina musei youf nigin ima su lai fe fen sũ we fiya taka to ibodõf, ere nigin, eneidi are Negur nẽ fateul tamo kayau bun to biya. ⁴ Takag, od sesen, neneya od be, od sane nem weli to unogouf, are ada nigin to biya, anĩ ere, de fiyẽya od wogõ gouf. ⁵ Ere nigin, ã momoi bagai enei keleĩ: Tamo noli tobonunã ado, amuyẽ ado be, safina musei youf nigin ima su lai fe fen sũ we fiya (tamo age fiya are idegẽya waitou yana yaleseya tamo), ĩ

† 4:26: Sam 4:4

Kristus ado Negur nē tano bun akor to yalouf. ⁶ To lo ge di, taka nem od egem idegneif, ere nigin, age fediya bunem Negur nē didi, idi nokū difef anidi bun isidig. ⁷ Anī nigin, idi geid to nigal ūgouf.

⁸ Ere nigin, ā uruwa bun gugum, anī ere, gama Odug bun ā lalan. Lalan nē gere tar gen agog ufareg. ⁹ Ere nigin, lalan nē faat are, biya fiya, madur bagai ado, momoi anī ganan bun ibodok. ¹⁰ Agog fen, ereb Odug wau al foug anī keleī youf. ¹¹ Ereb gugum bun tamal tobonunā faat biya sā anī geid to nigal ūgouf, anī ere, yaor wedigouf. ¹² Ere nigin, ereb fe temeleid iminēyan age difedig anī nigin irōya, areg mama ado. ¹³ Anī ere, ereb ereb ganan lalan bun yaor fef, are yaoredig, ¹⁴ ere nigin, lalan anim age fe di, ereb ereb ganan yaoredig. Enei nigin wogōya eig yef, “Fā wale, mulaī tamal, laa bun tamal fā wo, ago di, Kristus ō bun fula foug.”*

¹⁵ Anī nigin, āgenei ibodōya nigin el ge lo walagouf. Kisi sā gen to ufaragouf, anī ere, kisi biya ado gen ufaragouf. ¹⁶ Naa biya ā nigin wō youf ganan to sekil goug, ere nigin, naa are sane. ¹⁷ Anī nigin, to neneg, anī ere, Odug nē oroya naig fiya anī ā keleī youf. ¹⁸ Ā wain musei to wō ge di, meleī waī youf, are bouwa nē oroya nigin total sane wau fāya bun irouleyeif. Age fiya ban, Awa Uurem nameī isokosouf. ¹⁹ Od Negur nē Itotoya Sam bun ibodok, Negur yana yaleseya seg ado, uur nē seg bunem abob wogō wiyēgouf. Āgenei wauī bun Odug bun seg waleg fen, kakū goug. ²⁰ Sain ganan bun, Negur Tamada ereb ereb ganan nigin, neda Odug Jesus Kristus yana bun de wiyēgouf.

²¹ Kristus anini wiyēg fen, abob farumen ubodōg.

* 5:14: Asaia 26:19; 60:1; Rom 13:11

Tamo Aiwa Ado Kayau Aiwa

²² Kayau, ã Odug farumen ubodõgedig gen, aiweĩ tar farumen ubodõgouf. ²³ Ere nigin, Kristus ï, sios nẽ mudur ibodok gen, tamo ï kayau nẽ mudur ibodok, agef fen, Kristus ï sios, yogon bouwa nẽ kel yaleya tamo. ²⁴ Sios Kristus farumen ibodok gen, kayau idig ererb ererb ganan bun, dogo neid aiweid tar farumen dibodõf.

²⁵ Tamo, Kristus sios nigin wau laaf fen, yogo bouwa ï nigin ifenen gen, aiweĩ tar nigin wauĩ laa fouf. ²⁶ Kristus ï anĩ age fen, are sios fateul ibodõf nigin od bunem naan nem fili youf nigin kulof fen, ²⁷ are sios medeĩya bagai, diri sã, ifokoĩya be, ererb age fiya taka sã, anĩ ere, fateul fen bouwa od sã, yogo bun iroulauf nigin age fen. ²⁸ Age fiya bagai, tamo dogo bouweid nigin waud laa fedig gen, aiweid tar nigin agef waud laa fouf. Aib ï aiwa nigin wau laa fef, are yogo nigin wau laa fef. ²⁹ Aibem taka yogo bouwa to sane fiyẽdig, anĩ ere, ï ifout ken, kulatun fedig, Kristus sios nigin age fedig gen, ³⁰ ere nigin, ada yogon bouwa nẽ tunĩ. ³¹ Are Negur nẽ Itotoya eig ye irok kilei, “Age fiya nigin, tamo ï yogon tama sina ado itorneid fen, yogon aiwa ado bagu difouf, age de fen, idi uruwom bouweid tekelei youf.”† ³² Waa enei are, odug bagai, anĩ ere, aya Kristus ado sios nigin wogõ auf. ³³ Anĩ ere, ã aug nigin wauĩ laa fedig gen, ã mugu mugu ãgenei kayau tar nigineg agog wauĩ laa fouf. Age fe di, kayau ï yogon tamo farumen ibodõf.

6

Sina Tama Kesu Tar Geid

¹ Kesu, Odug bun sineĩ temeĩ tar sigoreid dõ gouf, ere nigin, anĩ madur. ² “Sinã tamã yeneid walesauf,” are ïtäfiya matu promis ado bagu fen, ³ “anĩ bunem, õ ibodõya

† 5:31: Jenesis 2:24

biya ile di, tenebur ein sain meluk ubodōf.”* ⁴ Tama tar, gereñē tar waud saneya to wenēdig, age fiya ban, Odug nē tai fiya ado ifelnēya bunem lo wedigouf.

Ferfer Ado Marau Tamo

⁵ Ferfer, ã Kristus dō gounē gen, tenebur ein āgenei marau tamo, kumī ado aniniya ado, wauī adok bunem sigoreid dō gouf. ⁶ Ā meleid yaleya bunem to sigoreid dō gouf, anī ere, Kristus nē ferfer gen, Negur nē oroya, āgenei wauī adok bunem ago gouf. ⁷ Ā Odug aruna walogounē gen, tamo nigin sã, wauī adok yen ken, aruneid walogouf, ⁸ ere nigin, ã keleī, ĩ ferfer be, kafī fiya sã, Odug ĩ mugu mugu ganam, ereb biya age difef anī kilei, mala solo ifenēdiyof.

⁹ Marau tamo ã, āgenei ferfer naab de anī bunem el wedigouf. To kumīya wenēdig, ere nigin, ã keleī, ã ado idi nigin, āgenei Marau saa ilun ibodok, ĩ bun taka nigin dogol anī, kinau ya sã.

Negur Nē Kusī Nē Saki

¹⁰ Od idīya nigin, Odug bun ado yogon megeir barikã bun, total ufareg. ¹¹ Negur nē kusī nē saki ganam waleg, naki weleg fen, Satan nē kisi, fe fiyēya nigin, sã megeir ufaragauf. ¹² Ere nigin, ada neda kusī are, bouwa ado naud nē oroya fe fiyēya nigin sã, anī ere, uyu iroudiya, yeneid adodo, tenebur nē gugum nē megeir ado, saa ilun kaa sesen nē megeir nē total fe fiyēya nigin. ¹³ Anī nigin, Negur nē kusī nē saki ganam waleg, naki weleg, anī bunem, sesen nē naa wō ye di, ã tutub yū ifareya nigin kisi feleya, agog fen, ã ereb ereb ganam agog fen, ufaragauf. ¹⁴ Anī nigin, total ufareg, momoi nē lū luweī gug fen, madur bagai nē siot kapam akoreī dedeg, ¹⁵ agog fen,

* 6:3: Eksodas 20:12; Diuteronomi 5:16

ãgenei yeĩ bun su ufonũg fen, maror nẽ biya od wogõya nigin dodok fiya saika ufaragauf. ¹⁶Enei ganam bun tobol fe fen, momoiya nẽ makanam waleg, anĩ bunem, ã sesen nẽ magir yã bale ado isif anĩ ganam, sã gare walagauf. ¹⁷Agog fen, kel yaleya nẽ hat kapa ado Awa Uur nẽ dimig, are Negur nẽ od, anĩ waleg. ¹⁸Kosẽya ado to fiya ganam bun, sain ganam Awa Uur bun kosẽ gouf. Enei kisi bun unog fen, saika ge fen, sain ganam Negur nẽ tamo kayau ganam nigin kosẽ gouf.

¹⁹Aya nigineg kosẽ gouf, are sain aya od arõf bun ganam, Negurem od ifana fen, aya kumĩ sã biya od nẽ waa anĩ wogõ auf nigin ago gouf. ²⁰Biya od enei nigin, aya soosi tamo wõ au fen, kalabus bun abodok. Aya to kumĩ au fen, biya od sã kurõ afalaisiyouf nigin kosẽg.

Idikeleya Nẽ Aanya

²¹Tikikus, turau oboiyou fen Odug bun kabĩ tamo dõ fiya biya, ĩ erab erab ganam irokeneĩf, age fe di, ãg, aya naig be afef ado aya ere kabĩ alef anĩ, keleĩ youf. ²²Aya, ĩ, gariya enei nigin bagai ã gein sur afef, are ã amã naig be fiya mabodok anĩ keleĩ youf nigin ado, ĩ ãgenei wauĩ megeir fouf nigin.

²³Tamada Negur ado Odug Jesus Kristus bunem, turau tar, wau inosiya ã bun ibodõf, agef fen, wau laa fiya momoiya ado ã bun isiyouf. ²⁴Idi, neda Odug Jesus Kristus nigin waud laaf fen, waud laa fiya anĩ to folõ difeledig anidi ganam bun, wau ifenẽya ibodõf.

Mata Ifenēya Nē Od
The New Testament in the Marik Language of Papua New Guinea
Nupela Testamen long tokples Marik

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 19 Oct 2021 from source files dated 20 May 2021

d7099f9d-3bdf-5620-8eb3-7e6c51cab7ea